

Negociacion pa e Definitive Participation Agreement den etapa cumbre

CITGO y Gobierno ta conclui un siman fructifero na Houston

ORANJESTAD (AAN): Minister Mike de Meza, titular di Asuntunan Economico y Energia, hunto cu su colega Minister Paul Croes encarga cu Labor, a lidera un delegacion di expertonan legal, financiero, tecnico y fiscal na Houston pa sigui cu e negociacionan pa futuro rehabilitacion y reapertura di e refineria. Diabierna ultimo nan a regresa sumamente satisfecho despues di un siman fructifero. "Negociacionan pa e Definitive Participation Agreement entre Aruba cu CITGO ta den un etapa cumbre," Minister Mike de Meza a declara. "E dianan cu ta tras di lomba a logra avanza riba temanan sumamente importante pa ambos partido."

Despues di a inicia e fase final di negociacionan pa un "Definitive Participation Agreement" na comienzo di luna di januari, varios sesion di negociacion a tuma lugar entre e equiponan di Gobierno



di Aruba y di CITGO na Aruba como na Houston. Durante su estadia na Houston, Minister Mike de Meza a reuni cu Dr. Nelson Martinez, Presidente y CEO di CITGO. Ademas di e mandatarionan, e delegacion di Aruba a consisiti di e equipo di negociacion asisiti pa expertonan riba tereno di refineria y operacion, como tambe pa expertonan legal y fiscal. "Hunto cu ambos delegacion di negociacion nos a fiha e plan di accion pa e ultimo simanan nos dilanti prome cu 31 di maart," segun e titular di Energia. "E siman aki e equiponan negociador lo

conveni atrobe na Aruba."

"E rehabilitacion di un pilar economico historico ta mas cerca," asina Minister Mike de Meza a informa na su yegada for di Houston. Despues di a yega na acuerdonan di principio riba temanan importante entre Gobierno di Aruba e refineria, ta negociando den mas detaye e modelo di negoshi, como tambe aspectonan di medio ambiente, laboral, fiscal y uso tecnologianan limpi.

"E fase di negociacion aki ta uno intenso y compleho entre Gobierno di Aruba y CITGO," Minister de Meza a indica.

For di aña pasa diferente mision nan tecnico, economico y legal a bishita Aruba. Nan a hasi nan investigacionan di e facilidadnan di e refineria, studia nos sistema legal, comotambehasinan analisis comercial. E fase nobo aki ta aki ta un resultado concreto di e empeñonan cu Gobierno di Aruba ta hibando for di algun aña. Minister de Meza, aunke cauteloso, a expresa su mes na un forma positivo riba e desaroyonan. Minister Mike de Meza a subraya cu e periodo nos dilanti lo ta uno crucial. Sinembargo e ta sumamente contento cu e paso aki y ta spera

cu e trabownan nos dilanti lo conclui di un manera satisfactorio pa pueblo di Aruba, en particular e parti p'ariba di nos isla.

Di acuerdo cu e Memorandum of Understanding firma dia 22 di september 2015, CITGO a indica na Gobierno di Aruba prome cu 30 di november di lo inicia e negociacionan pa reapertura di e refineria na Aruba. Segun e MOU e siguiente fase di negociacion a resulta den un Heads of Agreement, of acuerdo marco, cu a wordo firma dia 23 di december ultimo. Na januari ultimo, Minister de Meza hunto cu President y CEO di CITGO a hasi e "kick off" pa inicia e negociacionan di e "Definitive Participation Agreement" entre Gobierno di Aruba y CITGO.